

Sunday, January 18, 2026

Time - 2:30pm - 2:35pm



PM VISHWAKARMA HAAT 2026

Sorkar laipui hmalakna zinga mi PM Vishwakarma Haat 2026 chu vawiin atang khan Delhi-ah hman a ni a, he hunah hian Mizoram atangin mi pathum an tel.

Mahni kutkawih thiamna hmanga thil siam chhuah zuar chhuak zingah hian, Mizoram atangin Lalmuanpuii, Kawnpui chu bakah Aizawl district atangin C. Lalfakzuali leh Lunglei District atangin R. Lalremhlamawii te an tel bawk a, an kutkawih thiamna hmanga an siam chhuah te an zuar a ni.

Akashvani News Aizawl zawhna chhangin Kolasib District atanga tel Pi Lalmuanpuii chuan, PM Vishwakarma Scheme chu tun hma atanga a hriat tawh leh kum 2023 khan a inziahluh tawh thu a sawi a, inchhung cheimawina bungraw hrang hrang a siam te chu kum 2017 atanga bul a lo tan tawh niin, kum 2024 November thla khan Aizawl Sipai Lammualah pawh a lo inzuar chhuak tawh tih a sawi bawk.

PM Vishwakarma Haat 2026-ah hian India ram state leh UT hrang hrang atangin mi 117 zetin an thil siamte an pho chhuak a. January ni 18, Pathianni atanga January ni 31 thleng chawhma dar 10:30 atanga zan dar 10:00 thleng neih a ni ang.



BAWRHSAP AWARD

Lawngtlai hmasawn theihna tura ruahman, veng 12 inelna Bawrhsap Award chu hlawk taka kalpui mek zel a ni a, faina kawngah nasa taka hmalak mek a ni.

Lawngtlai Bawrhsap Pu Donny Lalruatsanga ruahman - kumtina chhunzawm tura tih Bawrhsap Award bultanna hi nikum November atang khan hmalak tan a ni a, Lawngtlai khawpuia Veng 12 ten an huamchhungah faina beihpui thlakin, kawngpui kam leh tuihawk luankawr te an thianfai a, veng mipuite hnenah vantlang tlangau kaltlangin, mahni In leh a vel vawngfaia, awmze nei zawka an lirthei leh hmanrua te dah turin an in ngen bawk ani.

Bawrhsap Award hian Veng fai leh inenkawlina tha, Ran khuahkhirh leh Lirhei dahdan mumal te, nunphung tha inzirtirna leh midang tana hnawksak lo, zahawmtaka nun hona vawng tha te chu ngaihpaawimawh hmasak a ni dawn a, kumtinin Republic Day-ah Award hi hlan thin tura ruahman niin lawmman thatawk tak siam a ni dawn ani.

Bawrhsap Award dawngtu tur endik turin Mizoram Journalist Association (MJA) Lawngtlai District ruat an ni a, anni hian thla tin Veng hrang hrang dinhmun an enfiah thin anga, Republic Day hma hian veng 12 te hi vawi hnih tlawhchhuah an tum a ni.



READING DECATHLON QUIZ

Food4Thought Foundation leh Monocept te buatsaih ram pum huap School zirlai naupang te pual a Reading Decathlon Quiz competition buatsiah Final-ah Mizoram atangin Mount Carmel School, Chaltlang leh La Montessori School, Mission Veng te an inlan.

Final hi nimin khan neih ani a, Mizo nauangte hi Mizoram leh North East Zone aiawh turin Hyderabad lama kal tur an nih laiin Thlawhtheihna lamah harsatna an tawh avangin Mizoram Youth Commission Office atangin Online a competition hmachhawn mai turin dilsak an ni a, dilna hi phalsak an nih angin MYC Office atangin National Round (Final Round) hi Online hmangin an hmachhawn a ni.

First Round hi nikum August ni 22-ah khan Online mode hmangin MYC conference room-ah buatsaih a lo ni tawh a. Hetah hian School pali (4) an tel a. He round-ah

hian North East region aiawh tur thlan an ni a. North East region aiawh tur hian Mount Carmel School leh La Montessori School te hi thlan an ni ta a ni. School pahnih te hian nikum November ni 29 khan Indore, Madhya Pradesh a neih Regional Round chu paltlang leh in National round hi an thleng a, Mount Carmel hi 2-na niin La Montessori hi 3-na an ni.

School pahnih atanga zirlai tel te hi Mount Carmel School atangin Rebek Malsawmzuali leh Krista Roluahpuia Khiangte te an ni a, La montessori school atangin Malsawmhlui Pachuau leh Joshua Lalawmpuia te an ni.



KAZIRANGA CORRIDOR PROJECT

Assam-a Cheng vch 6 leh nuai 950 chuang senga Kaziranga Elevated Corridor Project thawhna tur lung, vawiin khan Prime Minister Narendra Modi-a'n Nagaon dist-a Kaliabor-ah a phum a, Km 86-a thui tur he project hi National Highway project niin, Km. 35 chuan Kaziranga National Park a pal tlang dawn a, Nagaon, Karbi Anglong leh Golaghat dist-te a paltlang dawn bawk a ni.

Thu sawiin Pu Modi-a chuan Kaziranga chu nungcha humhalhna hmun chauh ni lovin Assam hmun pawimawh ber a ni, a ti a, Kaziranga chu UNESCO pawhin World Heritage Site-ah puangin tlawhtu pawh an pung chho zel a ni, a ti a, Kaziranga leh nungchate humhalh chu Assam hmalam hun atan leh chhuan lo awm zel turte tan a pawimawh a ni, a ti bawk.

